

【二十九種莊嚴】（名數）天親之淨土論，觀察彌陀之淨土，明二十九種之莊嚴。其中淨土之依報，即器世間清淨，有十七種，淨土之正報，即眾生世間清淨，有十二種。

依報十七種者：一清淨莊嚴，勝過三界有漏之穢土而無漏清淨也。二量莊嚴，究竟如虛空無邊際也。三性莊嚴，依正道之大慈悲無漏之善根，隨順法性而生起之淨土也。四形相莊嚴，淨土清淨，光明滿足，如明鏡日月輪也。五種種事莊嚴，備諸珍寶，具足妙莊嚴也。六妙色莊嚴，無垢光燄熾，盛明淨曜世間也，七觸莊嚴，莊嚴淨土之種種珍寶柔軟，觸之者生勝樂也。八三種莊嚴，水上與地上及虛空之三處莊嚴也。九雨莊嚴，雨寶衣寶華，無量之妙香普薰也。十光明莊嚴，佛慧明淨之日，除世之痴冥也。十一妙聲莊嚴，淨土妙聲深遠，善聞於十方也。十二主莊嚴，正覺之阿彌陀，為法王善住持也。十三眷屬莊嚴。諸菩薩眾由如來正覺之華化生也。十四受用莊嚴，受用大乘之法味、禪味、三昧味也。十五無諸難莊嚴，永離身心苦惱，受樂無間斷也。十六大義門莊嚴，淨土是大乘善根界，一切平等清淨，無譏嫌之名言與譏嫌實體（譏嫌：女人、六根不具及二乘），眾生普為大乘之薩埵，一味平等也。大義門者，謂淨土為通大乘義利之門戶也。十七一切所求滿足莊嚴。眾生之所願樂，一切能滿足也。

正報之十二分為二種，佛有八種，菩薩有四種。

佛之八種者：一座莊嚴，無量大寶王，微妙淨華臺也。二身業莊嚴，相好光一尋，超於色像群生也。三口業莊嚴，如來微妙聲，梵響聞於十方也。四心業莊嚴，同地水火風，虛空無分別也。五大眾莊嚴，彼土之人天聖眾，皆成就大乘善根，由如來清淨之智海而生也。六上首莊嚴，阿彌陀佛於淨土為上首，如須彌山王勝妙，無有超過者也。七主莊嚴，阿彌陀佛為彼土之教主，天人丈夫之眾恭敬瞻仰也。八不虛作住持莊嚴，佛之本願力非虛設，遇之無空過者，必能令速滿足功德之大寶海也。

菩薩之四種莊嚴者：一不動本處遍至十方供養化生莊嚴，二一念一時遍至佛會利益群生莊嚴，三一切世界讚歎諸佛莊嚴，四無三寶處示法莊嚴也。

此二十九種皆由彌陀之願心而莊嚴者。見淨土論。～《佛學大辭典》